

CHRISTA HOUBUNG KHANTOUNA

Ama thu chu kahillu ahi, mijouse hi aphot chamkima Pathen anga kadinsah theina dinguva kachihna jouseuva amitakip kapholeuva Ami jouse kahilu ahi (Col 2:28)

By. Rev. Hemkhomang Haokip, B.D

4. Pathen kelngoihon ahi (Flock of God): Bible ah tahsanho ahilouleh Christa houbung chuleh Israel hi kelngohontoha tekah ahin, kelngoipu akitileh Pathen ahilouleh Chrsita kiseina ahi (IPet 5:2). Pastor ho jonghi kelngoipu in akiseijin ahi. Houbung hi Christan athisana achohdoh ahin, achingpipa (Chief Shepherd) akiti leh Christa kiseina ahin, Pathen kelngoioho ching dia nganseho chu ahileh Pastorho chu ahiuve (Acts 20:28).

a. Christa chu kelngoi chingpipa ahimonge ti ihetdoh tengleh khantouna umpan ahije: Pakaijin vang athisana achohsa akelngoioho chu amin cheh in ahesoh keijin, khateing chajong asumilpoi. Hinla eiho akelngoioho vangin ichingpau isumil jiuvin ama akonim ivahmang jiuvin, midang nung ijuu jiuve (Ps 23:1-3).

Kelngoipule kelngoioho hin midang koiman ahethdoh joulou kijopna khat giltah in aneijun ahi. Hijeh chun kelngoioho alamvai tenguleh kelngoipu alunghemjin akou koujin ahi. Kelngoihon jong achingpau kelngoipu amulou tenguleh lung gentheijin apeng peng jiuvin ahung kinungle louho chu sakeihon anejitaovin ahi. Jesun hitin ati, "Ka-kelngoihon ka-aw aheuin, keiman amaho kahen chuleh amahon kanung eijui jiuve ati (Jn 10:27). Eiho tahsanhon ihuhhingpu Jesu Christa ikelngoipun iching jingnai" ti ihetnuva lungmonga ikhosah thei tenguleh lhagaova khantouna machalna pilhi na umji ahi.

David chun "Pakai chu kelngoi chin a eichingpa ahijeh in keima lhasam ponge" ati (Ps 23:1). Kelngoipu chun akelngoioho chu hamhing lah lah a apuilen an anehva sah avahva tenguleh vapama twikhuh akhotpeh in killing louva um twi chu achipsah jiu vin ahi. Kelngoipu chun akelngoioho avahvaset tengleh inlama ahin puia, ahongsunga ahoilutjia lungmonga akolsah jiu ahije. Kelngoipu chun akelngoioho chu avahvaset jeh uchun akelngoioho chu ahongsungah lungmongin akoljuivin ahi. Hiche bang hin Pastor honjong ihoubung memberho chu lhagao anle twia ivahvasetjiu hinam? Midangho tichu houbung dangho lah a lutding lunglutna aneithej jiuvem? Nangma anpeh sanga midangho lah a lutding lunglutna aneithej jiuvem? Nangma anpeh sanga midangho anle twi angaichat joh jiuvem? ! Kigellun kelngoipuhoh !

Kelngoihon lah achun abang bangho chu apu nung juinomlouva ahonlah dalha a vahmang jong aumjin ahi. Chutia ahonlah ahin nungdel kitlou tengleh gammanglah a sakeiho chun abotteljivin anejitaovin ahi. Kelngoipule ahon chutoh kigamat jing kelngoioho chu sakeijin abahgam jitaovin ahi. Kelngoioho dingin kelngoipule ahonlah tilou lungmonna umlou ahi (IPet 5:8-10).

b. Kelngoi chinglenpan akelngoioho chu phat khatleh ahung kipuitou ding ahi: Pathen kelngoi chinglenpa/Chingpipa (great shepherd) chun akelngoioho hi phat khatleh ama umna muna dinga ahung kipui diu ahi (Jn 14: 1-2). Tuphatna hi kelngoi chingpipa hin

akelngoiho hi ama umna akona ahin galchin a, ahin galvetsui ahiye. Hijeh achu chungu kelngoi chingpipa kipana banga umjing akelngoiho chu adolchek a kipaman apeh diu ahiye. Hinla apupa lunglhaina banga umjouluho chun akipa mandiu chu akimansah diu ahije. Khutgoh keuva apakaipa lamtoa cheho dinga chu jachat umtah agato diu ahije. Hichu tahsanho dinga jachat umtah kiti chu hiding ahitai.

c. Pathen kelngoiho chinga kinganse leikelngoi chinghon akelngoiho chu avahvaset tenguleh khantouna umji ahi: Kelngoi chingpipa Christa hungkah a kinganse leikelngoi chingho chun Pathen kelngoiho chu lhagao anle twia avahvaset tenguleh Christa houbunga chu khantouna umji ahi. Pathen kelngoi chinga kinganse Pastorho, deaconho chun akelngoiho chungu chu kipiputsah louva ngailuttah a kehgoiho chu a vetsui jinguva ahileh achingpipa ahungtengleh nganseho chu kipaman loupina Lallukhuh apehdiu ahije.

Tuhil dihluo ngeihangho akona Bible thuhila avenbit dinga chu thupeh ahivu. Midangho thuhil ngaichalou hella kelngoipuhu chun ahoubung chu lhagao anle twia avahvaset diu ahi. Bible thuhil a adindetpi dinga ahi (Ps 23:1-6; IPet 5:4). Kelngoi chinga kinganse kelngoipuhu chun ahonga umho achintup a avahva dingseh hilouva, hong polama umho jong hongsungu aga hoilut ding ahina laiye (Lk 15:1-7; Jn 21:15-16; Acts 20-27).

Kelngoi chinga kinganse kelngoipu chun akelngoiho ding lhagao an polut talouva, leiset lama amaa ding bou kigelkhohna ahin neiteng chuleh akelngoiho chu gamgo lah a khaova ahen a anle twi angolsah tobang chu ahi. Chuteng chuleh akelngoiho chu kitom tomjiuva akihenna khao abotan jiuva hondangho lah a lhailutjiu ahitai. Chutia kelngoi chinga kinganse lei kelngoi chingpa chu akitahlouva atoh ding banga atohlou teng chuleh ama chu mohvet louding ahi. Aumchan le anatohdan akhel dingha ahilouleh apan mun alhakang dingham akilhen ding ahi. Achuti louleh Pathen kelngoiho chu chehchao gam diu chuleh mangthah gamdiu ahitai. Ajeh chu kelngoipu chungu hin kelngoiho thina ding le hinna ding thu aumin ahi. Akingansena banga tonglouho lunglut louho ahilouleh donselouho chun atohmun aot ding chu thilphapen ahi.

d. Kelngoihon chun achingpa nung hoitah a ajuitengleh khantouna umji ahi: Kelngoi chinga Pathen in angansepan akelngoiho achintup a avahva dingseh hilouva, kelngoihon jong achingpa nung nung phatah a ajuiding angaiye (Jn 10:27). Kelngoiuan akelngoiho aw ahetchek a, amin cheh uva akouji banga chu kelngoihon jong achingpa awgin ajah jing uva ajuidiu ahi.

Houbung sungu kelngoipule kelngoiho kah a kihet khelna ahung umtengleh Christa houbung khantouna dingho chu adaljin ahi. Kelngoipule kelngoiho kah achu kiginle kijatona aum jinga ahileh kingailutna apengdoh jingin chuti chun Christa houbung chu akhangtou jingin ahi.

5. Pathen huon ahi (The Garden of God) : Bible sungu hin Christa houbung hi Pathen huon ahilouleh Pathen loumatoh tekah ahi (Jn 4:35). Huon ahilouleh lou chu kilhou

gimsella muchi chuleh thing gatheiho kitua agaho chu aleihoupa le aneipa kihomji ahi (ICor 3:6-9).

a). Natonghon Pathentoh atokhom tengleh khantouna umji ahi: Apostle Paul chun, “kelho hi Pathentoh tongkhom kahiuve, nangho hi Pathen louma nahiueve” ati (ICor 3:9). Pathen na hi Pathentoh tokhom angaije. Hinla abanghin Pathen na hi Pathentoh atong khomun, abangin Pathen panglou banga amachangseh a tongdan in akigellin genthei akisa l’eh un, phunchel pum pumin min adadaa atohsah danin akigellin ahi. Hiho chun tohga asohdoh loudiu ahi. Chutobangho chutoh Pathen in na atongkhomjipon ahi. Mihemle sumle paijenga kinema tonghon jong tohga asolou ding ahi.

Pathen hi khutle keng neilou lhagao ahijeh achu, khutle keng nei mihemte hitoh atokhonji ahi. Hijeh achu Pathen natohna dinga chu Pathen manchah thei itahsa chungu um itabahho hi Pathen adinga katdoh ngai ahi (Rom 12:1-2). Mutheia natonghi mihem ahin, mutheilouva natongji hi Pathen ahi. Hitia chu Pathentoh ana itoh khomjiu ahibouve (ICor 3:8). Pathen loumaa natoh dan chu khat in aphua, michom khat in atwi achapjia chua Pathen in akhansahji ahi (ICor 3:8).

b). Abahho chu lengpiguia abejing laisea gaji ahi: Pakai Jesun aseijuiho hengah “Keiah umjingun, keia umlou chun ga asodohjipon, abah bangin paidoh in aumjin chuteng meilhum sunga govamin aumjitai” ati. Pakai Jesun aseibena ah “mi keia umjinga, keima amaa kaumjing theina chu hagan agajin kapa choiat in aumjie” ati (Jn 15:5-18).

Christa tahsan khat chu atahsanpa Christa chutoh akijopmat jinga ahileh chua chu khantouna pilhinna machalna umji ahin, chua chu tohga asodohji ahi. Ajeh chu vangam luttheina hi Christa tahsanjuh a lungset man thil thonpeh ahin, hinla tohga sodohna hi tohphat man ahi. Christa natahsan chu akicheh a ahileh nahinkho mandan in ahin juitoupeh ding ahi. Pathen chaten Pathen na hi Pathen toh tokhom ding ahi (Col 1:27).

c. Lengpiguia abahho chu akimalngim jinga ahileh hagan agajin ahi: Lengpilei l’hou chun phatseh a ahuan sunga lengpiguia abah gopho amalngim jinguhi imadang jeh ahapon ahaga chehna ding ahi. Tahsanho hinkhoa hi lhagaole taksa a ikimal ngim jing diu aseina ahi (Jn 15:2). Tahsanho hinkho le houbung sunghi phatseh a kivetchil jing angaidan Bible sung mun tampiah akiseijin ahi. Ajeh chu thutanna ichunga ahung lhun masanga eima kikhoh chilla kisuhdih dinghi Bible in aseijing chu ahi.

Houbung sunga dan ngailouva tahsanho lah a chonna, jonthanhoi, guhchat, jousei, adihlouva hettosah a pangho chuleh bible thuhiltoh kitohlou thuhil hin polutho chungu chu Pathena konham houbunga konhama thutanna hung umji ahin chua kishna lungheina neilouho chu paidoh a umji ahi.

Lengpiguia beh abah agalouho ahaga chehna dinga mimal hinkhole houbung sunga chu kisuhdihna aumjing angaijin ahi. Ajeh chu adanghon kichatna kichih theina anei theina diuva chu kilhit chilna aum jing angaijin ahi (ICor 6:5). Hiche gambolna akona suhdihna hung umji hi pan chate angailutna jeh ahijin ahi (Pro 3:11-12). Insunga chaten pa thu amanlou tengleh pan chate hina dola suhdihna dinga agimbolji hi pa ngailutna jal ahi (Heb 12:10-11). Hiche gimbolna hi chaten pa ngailutna jal ahi ti akisanthem uva ahileh khantouna hiding ahi. Hitia chu asan theilouva alhasetpia anuoh a ajammangleh amadia manthahna ahijin ahi.

6. Pathen Insung ahi (The family of God) : Bible in tahsanho tahsa pumhi Pathen lhagao chenna inn kisadoh tin aseijin ahi (IPet 2:5). Paul injong Timothy henga chun kahung geisang khahleh thutah khomle bul, Pathen hing houbung Pathen insunga chu mi itobanga iti umchan dingdol ahi nahetna dinga ahi ati (ITim 3:15). Paul chun Ephesia houbungte koma chun, "Pathen insung mite" nahiuve ati (Eph 2:19). Tillaia michom choma ana kiseijing Israelle Gentile jong Cross thil boltheina jallin Christa tipuma chun pumkhat ahitaovin ahi (Eph 2: 14-16). Ajeh chu Christa tahsan jouse chu Pathen chate ahitaovin ahi (Jn 1:12). Hiche jeh achu atahsan jousen Pathen chu Abba hepa tia ikou theiju ahitai (Gal 4:6).

a). **Pathen insunga chu kipohtupna, kivetsuina kilamkaina phatah ahung umdoh tengleh khantouna umji ahi** : Tahsanho chu Pathen insunga member khat hina ahung chan tahjeh achu Pathen vangbohna hung changpan ahitai (Eph 2:9). Pathen insung/houbung sunga thupuh (Order) akigondan (structure) chuleh machalna (progressive) chu I Tim 3:4,5,12 sungah akimun ahi. Hiche sunga hin Pathen insung kivaipoh ding dolle a vaipo dingho vaipoh dingdol jong akimun ahi.

Insung jousen pa khat cheh ngaichat ahibanga, kelngoihon injong achingtup dingle avesui dingu kelngoipu khat cheh angaichat jingu ahi. Christa houbung sunga vaipo dingle chinghuoi kaihuoi ding kelngoipu ngaichat hijing ahi. Pa chingtah in ainsunga aji achate kituptah a avaihop a nehle don ijakaia angaichaho apehjou jingle ainsung chu khangtouji ahi. Pathen kelngoi chinghon jong Pathen ngansena banga Pathen insung/houbung chu achintup a avetsui ngai ahi.

b). **Kipum khatna le kilung khatna ahung umtingleh insungle houbung sung chuleh kiloikhomnaoha khantouna hung umji ahi**: Paul in Galatia houbungho henga chun kikhentelna kichom khennaho apailah uva Christa a akipum khat diuin ana hillun ahi (Gal 3:28). Mi koi hileh Greek mi hihen, Judah mi hijongleh Christa a ahung penthah tengleh Christa tipuma chu Pathen a pum khat hung hiuvah ahitai (2Cor 5:17).

A. Christa tahsanho chu :

1. **Michonpha ahitai (Righteous)**: Ajeh chu midangho (Gentileho) banga apen monga lunghanna chate inahiu ahi. Ahi vangin mihepi khotona haotah Pathen in ngailutna lentah a eingailutnu ahi. Hijeh achu themmoa ithilaitah uva Christa toh thakhattah a eina hinsah u ahitai (Eph 2:3-5). Ichonphatna dinguva chu Christa Jesua kisema ihuive (Eph 2:10). Thutah chonphatle thenna pathen lima asem ahitai (Eph 4:24). Christa itahsan jeh uva chu eiho chonsetnaho chu athaimanga Pathen chonlphatna achu eivonu ahitai.
2. **Tonset hinna anei ahitai (Everlasting life)** : Pakai Jesun kathusei ngaia tahsan chun tonsot hinna anei ahitai ati leh atahsanhon Pathen tonsot hinna chu ineiju ahitai (Jn 5:24) Atahsanlou chun tonsot thina akikkeh khol ahitai. Pathen chapa Jesu Christa tahsan chan chun tonsot limna chu anei ahitai (Jn 3:16).
3. **Mitheng kiti ahitai (Saints)** : Mitheng kiti thucheng hi mihem in atahsa asuhteng a alodoh theihuoi hilou, athenjeh a mitheng kiti hilou, Christa atahsan jeh a Christan athisana asop theng jeh a mitheng kitijoh ahi. Aman thenna hinkho amanjeh a mitheng kiti ahidingleh akilodoh hiding ahin, hinla chuti ahipoi, Christan athisana asopthengtah jeh achu mitheng kiti min hi chang ahitai. Chuleh Pathen in mitheng atitahjeh achu aman jong thenna ajilla tahsalam kisuh bouhnaoha kona akisuh theng ngai ahina chu asej ahi.

Alungthimle atahsa akisuh theng jing ngai ahi. Ajeh chu Pathen in alhagao ahuhhinga mitheng min hi apeh ahitai. Chutia chu Pathen insung mi hina achu Pathentoh umkhoma napha tongkhom ding ahitaove (2Cor 6:17-18).

a. Amaho chu Christa thisana kisoptheng ahitahjeh uva chu mitheng kiti min hi Pathen in apeh u ahitai (Rom 1:7; ICor 1:2).

b). Amaho chu Christa thisana akisoptheng keuseh u hilouva vannoi leiset chonset thilbuohho tongkha loudia vanmi hina jong apeh ahi (phil 3:20).

c). Amaho chu Pathen in amitheng ahitah jeh a kipaman/tohphat man sangtah jong pehdia ateppeh ahitai (Gal 6:9; Heb 10:35,36).

4. **Pathen insung mi khat ahitai (Jn 1:12)** : Pathen insung mi khat hina dinga lhinjouna dingho chu:

a). Amasapen a, penthahna louva chu Christa houbunga member khat hina chu lhing joulou ahi. Christa houbung dihtah khat achu member hina dia lhinjouna neiho chu vana Pathen insunga jong member khatna lhingjou ahitai (Acts 2:41-47).

b). Anina a, Lhagaova penthahna dihtah aneitah monga ahileh Bible thupeh ngei banga phumthoa twilut aboltei ding Pathen insung mi khat hina a kipehlutna namdetna aboltei ding ahi (Acts 2:41-47; 19:1-5).

5. Amun houbung dihtah khat hina chu ipipi ham?

a. Amun houbung chu Pastor khat neithe houbung ahi angaije (ITim 1:5 ; 3:1-7).

b. Amun houbung dihtah chu chamlhat tah a pakai natohna nei hidingu polam mite thanei khum thei hilou ding, ama kenga kiddin theia, koima chungu jong kengamlou hiding ahi (Acts 13:1-4; Rom 16:1).

c. Pathenin asemboh memberhoa kona hung umboh houbung hiding, mihem boldohtho memberhoa kona kismboh houbung hilou ding ahi (Acts 2:47; ICor 12:18).

d. Pathen thua kivaohoh kivaoh khang houbung hiding ahi (IPet 5:2).

e. Pathen thule lhagaova kivaoh khang houbung hiding ahi (Eph 2:19).

f. Themgaohole solchaho thuhil a kiputboh houbung hiding chuleh Christa chu aningchonga akhompipen a apanna houbung chu hiding ahi (Eph 2:20-21).

g. Thilpha bolnom chanin thilpha aboltheina ding mun houbung ahiteiju ngai ahi (Gal 6-10).

h. Christa songpi chungu tahsanho (Songneuhoh) kisadoh hubung chu hiding ahi (IPet 2:5).

6. Amun houbungoh koma kipe thupehlen niteni chu : Tahsan twilut le Pakai anjon ahi.

a. **Tahsan twilut** : Tahsan twilut hi ahung umboh theina dingin tahsan thui ahung lut masat angaijin ahi. Hiche tahsan thu chu Christa thina akona athokitna kipana thupha chu ahi. Hiche Christa kipana thupha hi seiphongle dinga apostleho ahilouleh Christa houbungoh hi

ngansena kipe ahiuve. Amahon gamgi neilouva namtin henga hiche kipana hinaa thupha hi aseiphong dinguva thupeh kipe ahiuve.

i. **Christa Pathen mopohna:** Christa kipana thupha seiphongle dinga thupeh pepa chu Pathen ahi kipana thupha seiphonglehon kipana thupha aseitenguleh miho lungsunga natongji jong chu Pathenma ahi. Hinla Pathen hi lhagao ahijeh in khut le keng kam aneipoi.

ii. **Houbung ahilouleh nangma mopohna:** Khutle keng chuleh kam hinsempa chun tunia hi akipana thupha namtin heunga seiphongle nadinga chu nangma khutle keng chuleh kam chu aman noma ahinthum ahitai. Nakhut nakeng le nakam chu asempa kipana thupha seiphongnaa naman dingha nangma deinaa naman dingham ahilouleh setan kipanaa naman dingham, tunihin chungga lengpa thupeh ahung lhunge kigellin. Hiche thupeh hi nahsaha nakoi louleh lhagao mangho thisan phuba chu lengpan nangma henga aphut ding ahi.

iii. **Thujaho mopohna:** Tahsanhon atahsan louho koma chu Christa kipana thupha agasei diu chu amopohnao ahin, hinla amahon ana tahsan louva nahsahlouva anabolluleh amaho chungga chu thupeh hinpea hinsolpa lengpan thu atanding ahi. Amahon ana jah uva atahsan uleh sohcha diu, ajah uva atahsanlou uleh amaho chu themmo chang diu ahi (Jn 3:17-18).

Athu jalou chun iti atahsan diuham? Thusei phongle beia iti ajah dingu ham? Chule akisol louleh iti aseiphongle dingu ham? (Rom 10:14-15).

b. **Twilut hilchet:** Twilut kitih tahsan twilut kiti ahijeh in atahsanhon bou aboldiuva thupeh ahi. Tahsan lou khat in twilut abola ahileh hichu twilutna kisimlou ahi. Ajeh chu aman Christa atahsanlou ahi. Twilut kiti hi pengthahhon bou aboldiuva thupeh ahin, pengthah louho boldingin akiseikhapon ahi. Chuleh twilut hi naosen le chapang khohelouho ajeh helouho bolding ahipoi. Pengthah twilutho jengin jong ajeh chu hetna neitah a aboldiu ahinalaije. Pentahna hi vangam lutna ahin, twilut hi houbung a pakai natoh theina dinga houbunga member hina dinga thilpha bolpatna dinga abolding ahi. Pengthahlou khat in twilut abola ahileh themmo achanna dinga abol ahije (Mk 16:16).

C. **Pakai Jaan an (Lord's supper):** Pakai Jesu cross a athi ding kona aseijuiho to akilhahnao ankuong chu Pakai Jaan an kiti ahi. Jaan a kilhahna ankuong aum khomnao ahijeh a Pakai Jaan an kiti ahi (Lk 22:15-16). Hiche Pakai jaan an hi pakaile aseijuihon anabolu chubana Paul in houbungho henga anabol jing diuva thupeh ahinpehson chu ahi. Hiche Pakai jaan an jonghi mijouse nehding ahapon ahi. Christa tahsana twiluthon bou houbungho toh anehkhom diu ahin, changseh a nehding jong hilou ahi. Athu hechen louva nehding jong ahikitpon ahi.

i. **Pakai thangvahna a nehding ahi (ICor 11:24):** Christa thina leh thokitna ichanjeh uva ama chu ithangvah uva inehdiu ahije.

ii. **Vangboh channa dinga neh ding ahi (ICor 10:16):** Christa thisana sopthenga iumuva tonsot themmo changa thidingsahon hinkemlou vangvohna ichanu ahijeh a nehding ahi.

iii. **Thilpeh ichanjeh uva (gift) :** Aman simjoulou, aman peh a chojhjou hilou, Pathen in achapa Christa athona eipeh jeh uva inehdiu ahi.

iv. **Kivoppina jeh a (communion)** : Pakai Jaan an hin Christa atahsan mithengho kivopkhomna avetah in ahi (ICor 10:16).

- B. **Thuchaina** : Houbung limho vetsahnale houbung khantou umje ihin simtoupeh tauvin ahi.. Houbung hi ahing achatloh thei ahijeh in khantounale lhahsuhna anei theije tijong ihin simdoh taovin ahi. Chuleh Christa houbung chu ahina ding banga akipuileh khangtou touva Chrita pilhin dung chan aphah thei ahi tijong ihin seijoutaovin ahi. Achainan Christa houbunghi Penticost nin a hung kipan in chuleh Rapture mitheng lahtou kichaileh houbung phat chu kichai ding ahitai ti iheuve. Pathen in Christa houbung mithengho umpi jing taken. Chuleh Pathenin hiche lekhabu sim jouse phatthei bohtahen, Amen.